

24 JUL 1996  
Mahathir-Rai  
DR MAHATHIR DIRAI SEMPENA 15 TAHUN SEBAGAI PM

KUALA LUMPUR, 24 Julai (Bernama) -- Para pemimpin parti pembangkang dan kerajaan hari ini mengetepikan perbezaan politik buat sementara untuk bersama-sama meraikan Datuk Seri Dr Mahathir Mohamad, sempena genap 15 tahun beliau menerajui pentadbiran negara.

Antara mereka yang menghadiri Majlis Jamuan Makan Perdana itu ialah Ketua Pembangkang Encik Lim Kit Siang, Presiden Parti Melayu Semangat 46 (S46) Tengku Razaleigh Hamzah dan Menteri Besar Kelantan Datuk Nik Abdul Aziz Nik Mat.

Juga kelihatan pada jamuan makan tengah hari anjuran Timbalan Perdana Menteri Datuk Seri Anwar Ibrahim dan Jemaah Menteri itu ialah Presiden Parti Bersatu Sabah (PBS) Datuk Joseph Pairin Kitingan, Timbalan Pengerusi DAP Karpal Singh, Timbalan Presiden PAS Haji Abdul Hadi Awang dan Timbalan Presiden S46 Datuk Rais Yatim.

Pemimpin parti komponen Barisan Nasional yang hadir termasuk Presiden MCA, Datuk Seri Dr Ling Liong Sik, Presiden MIC Datuk Seri S. Samy Vellu, Presiden Gerakan Datuk Seri Dr Lim Keng Yaik, Presiden Parti Bumiputera Bersatu (PBB) Tan Sri Haji Abdul Taib Mahmud yang juga Ketua Menteri Sarawak dan Presiden SAPP Datuk Yong Teck Lee yang juga Ketua Menteri Sabah.

Selain para menteri dan pemimpin politik, yang turut hadir ialah tokoh-tokoh korporat, bekas menteri dan pegawai kanan kerajaan yang diketuai Ketua Setiausaha Negara Tan Sri Ahmad Sarji Abdul Hamid.

Hadir sama pada majlis di Renaissance Kuala Lumpur, sebuah hotel baru di sini ialah anak perempuan Perdana Menteri, Marina dan tiga anak lelakinya, Mirzan, Mokhzani dan Mukhriz serta isteri masing-masing sebagai tetamu khas.

Anwar dan isteri Datin Seri Dr Wan Azizah Ismail menyambut kedatangan Dr Mahathir dan isteri, Datin Seri Dr Siti Hasmah Mohd Ali yang kemudiannya

bersalaman dengan Menteri-menteri Kabinet bersama pasangan masing-masing yang berbaris menunggu ketibaannya.

Ketibaan Dr Mahathir disambut dengan alunan muzik gamelan.

Majlis dimulakan dengan ucapan Anwar yang menyatakan kesetiaan beliau, para Menteri Kabinet, Menteri Besar dan Ketua Menteri serta anggota kerajaan keseluruhannya, kepada Perdana Menteri.

Perdana Menteri dan tetamu dihiburkan oleh penyanyi Yusni Hamid dan Salimah Mahmood dan pemain biola dari Perlis, Mat Long yang diiringi Orkestra RTM pimpinan Mokhzani Mahmud.

Klip video "Perjuangan Mu Yang Belum Selesai" yang menggambarkan perjuangan Dr Mahathir sebagai pemimpin negara, agenda kepimpinan serta kejayaannya dalam tempoh 15 tahun itu turut ditayangkan.

Selesai sahaja persembahan klip video, tepukan gemuruh diberikan oleh hadirin yang kemudiannya beramai-ramai menyanyikan lagu "Setia".

Dr Mahathir secara spontan kemudian bangun memberikan ucapan ringkas menyatakan terima kasih serta rasa terharu dengan sambutan yang diberikan itu.

Dengan diiringi Anwar, Dr Mahathir kemudiannya memotong kek kenangan yang berbentuk bangunan KLCC. Anwar juga menyampaikan cenderamata kepada beliau.

Dr Mahathir, 70, mengambil alih sebagai Perdana Menteri daripada Tun Hussein Onn pada 16 Julai 1981. -- BERNAMA

HS RAZ NMO